

Ikalaata ilya kwanda ilya Yookhani Uwandilo

Umusundikwa uYookhani ásimbile ikalaata ili ku Bhakilisiti bhamu bhe ábhabhuziizye anza bhaana bhaakwe. Akubhalamba aBhakilisiti kujendeelela kwimiilila akhinza mu lwitikho kwa Mlungu mwa Yeesu Kilisiti. Khabhili akubhasokha kukhaana imanyizyo izya bhamanyizyi abhi lenga, bhe bhaliipo mu shibhanza. Akubhakumbusya aBhakilisiti kuti uweene áamile nu Yeesu. Pe shiniisho, amanyile nalyoli kuti uYeesu áamile nu mubhili uwa muntu anziitwe, khabhili áamile Mwana wa Mlungu. Akubhasundiilila aBhakilisiti kuti, bhakhayibha nu wuumi uwa wiila na wiila, inga bhakujendeelela kumwitikha uYeesu. Akubhabhuzya kuti wiila aBhakilisiti bhakwanziwa bhamugane uMlungu na kuganana bhiihho.

Zye zili mu shitaabu ishi
UYeesu lye Lizwi lya wuumi
ABhakilisiti bhabhe mu lukhozyo, bhabhe bhantu bha Mlungu
ABhakilisiti bhaana bha Mlungu, bhagananaje
ABhakilisiti bhabhe amiiso na bhamanyizyi abhi lenga, bha
Kutola imbiibhi na kubha nu wuumi uwa wiila na wiila

Izwi ilya wuumi

¹ Tukuvwinsya izya wuula we Lizwi lya wu-
umi, we áliipo kufuma kuwandilo we insi yishiili
kupelwa.* Itwe twámwimvwizye na kumolola
na miiso giitu taneetwe, tukhamwenyaaga na
kumupalamansya ni nyoobhe zyitu. ² Wunuyo
uwa wuumi akhalolekha, itwe tukhamolola. Ishi
tukubhasimishizya na kuvwinsya izya wunuyo
we akuutupa uwuumi wunuwu uwa wiila
na wiila, we áamile kwa Taata uMlungu,
akhalolekha kukwitu.† ³ Tukuvwinsya izya Yeesu
wunuyo, we twámulolile na kumwimvwa, inga
mubhe peeka niitwe. Uwapeeka we tuli nawo
ku kubha peeka nu Taata uMlungu, nu Mwana
waakwe uYeesu Kilisiti.‡ ⁴ Tukubhasimbila zini-
izi, inga taseshele nhaani.

Kwikhala mu lukhozyo

⁵ Izi zye ntumi zye twázyimvwizye kwa Yeesu,
zye tukubhabhuzya imwe, kuti uMlungu
lukhozyo, atali na khiisi naakhamu mukaasi
yaakwe. ⁶ Inga tukulonga kuti tuli nu
wapeeka nu Mlungu, kumo tukujendelela
kwikhala mu khiisi, tukwanda lilenga, kabhili
we tutakubhomba uwanalyoli. ⁷ Ileelo, inga
tukwikhala mu lukhozyo, anza she uMlungu
akwikhala, pe tutibhe nu wapeeka taneetwe na
taneetwe. Kabhili ibhanda lya Mwana waakwe
uYeesu likutuzelufwa imbiibhi zyitu zyonti.

* **1:1** 1:1 Bhaazy Wandilo 1:1; Yookhani 1:1-3. † **1:2** 1:2
Bhaazy Yookhani 1:14. ‡ **1:3** 1:3 UMwana waakwe uYeesu
Kilisiti Bhaazy uMwana wa Mlungu mu Wilulanyo uwa mazwi
amajeni.

⁸ Inga tukuti itwe te twe bhi mbiibhi, tukuyikhopela taneetwe, tutawumanyile uw-analyoli. ⁹ Ileelo, inga twitikha kuti tubhombile imbiibhi, uMwungu atitutuyile na kutuzelufwa uwubhiibhi wonti, kunongwa ye uweene musunde, khabhili mugolosu. ¹⁰ Inga tukuti tutabhombile imbiibhi, tukumabhiikha uMwungu kuti wi lenga, khabhili tulikhaanile izwi lyakwe nziila.

2

UKilisiti we akutupuutila

¹ Bhaana bhaani, inkubhasimbila inongwa ziniizi, kuti mutabhombaje imbiibhi. Ileelo poope inga umuntu abhomba imbiibhi, tuli na we akutulambila kwa Taata uMwungu, wunuyoyu wu Yeesu Kilisiti, we Mugolosu. ² UYeesu we mpamba iya kubhoolwa na kwi dala liniilyo ayefwizye imbiibhi ziyitu na kutukhomaanya nu Mwungu. Khabhili te mbiibhi ziyitu nyeene khaala, lyoli ni mbiibhi izya bhantu bhonti.

³ Inga tukuzitinikha indajizyo zya Mwungu, pe tati bhe nu lusimishizyo kuti tumumanyile. ⁴ Umuntu we akuti amumanyile uMwungu, ileelo atakuzitinikha indajizyo zyakwe, akwanda malenga, atawumanyile uwanalyoli. ⁵ Lyoli umuntu wowonti we akulitinikha izwi lyakwe, amuganile uMwungu nalyoli. Idala iya kumanya kuti tuli nu wapeeka nu Mwungu, lye li liili: ⁶ umuntu we akuti ali nu wapeeka nu

Mulungu, akhondeeye kuti ayikhalaje anza she uYeesu akhikhalaga.

Indajizyo ya Yeesu iya kuganana

⁷ Bhaganwa bhaani, indajizyo ini ye inkubhasimbila te mpwa khaala, lyoli ndajizyo yiyi-ila iyi maandi ye mwámile nayo kufuma pe mwítishile. Indajizyo yiniyo iyi maandi, lizwi liila lye mwályimvwizye. ⁸ Khabhili indajizyo ini ye inkubhasimbila, ye mpwa.* Uwanalyoli waakwe wakulolekha mu njendo zya Yeesu Kilisiti, na mu njendo zyinyu, kunongwa ye akhiisi khakwepa, na lukhozyo ulwa nalyoli lukukhozya.

⁹ Umuntu we akulonga kuti akwikhala mu lukhozyo kumo akumuviitilwa unholo waakwe mu lwitikho, ali she akwikhala mu khi-isi. ¹⁰ Umuntu we amuganile uwamwabho, akwikhala mu lukhozyo. Khataliipo naakhamu mukaasi yaakwe akha kumwazya kubhomba imbiibhi. ¹¹ Heelo umuntu we akumuviitilwa uwamwabho, ali mu khiisi. Akujenda mu khi-isi, sita kumanya kwe akubhala, kunongwa ye akhiisi khamugubishiiye amiiso.

¹² Inkubhasimbila imwe mubhaana abhansi, kunongwa ye imbiibhi zyinyu zituyiliilwe nu Yeesu Kilisiti.

¹³ Inkubhasimbila imwe mubhataata, kunongwa ye mumumanyile uYeesu Kilisiti, we aliipo kufuma kawandilo.

Inkubhasimbila imwe mubhatunta, kunongwa ye mumutolile

* **2:8** 2:8 Bhaazya Yookhani 13:34.

umubhomba mbiibhi uSeetani.

14 Inkubhasimbila imwe mubhaana,
kunongwa ye mumumanyile uTaata
uMulungu.

Inkubhasimbila imwe mubhataata,
kunongwa ye mumumanyile uYeesu Kilisiti,
we aliipo kufuma kawandilo.

Inkubhasimbila imwe mubhatunta,
kunongwa ye mali na makha,
mulilemile izwi lya Mulungu,
khabhili mumutolile umubhomba mbiibhi
uSeetani.

15 Ishi, mutayiganaje kubhomba anza bhantu
bhe bhatakumutinikha uMulungu, khabhili
mutaviganaje vwonti vwe bhakuvigana. Inga
umuntu akuwugana uwubhiibhi uwa ma nsi,
atamuganile uTaata uMulungu. 16 Uwubhiibhi
uwa ma nsi we wu wuuwu: insungakho
imbiibhi izya mubhili, umwone uwa kubha
nakho khokhonti khe wakhalola, na mabaado
ge gakufumilana ni shuma. Vwonti viniivwo
vitakufuma kwa Taata uMulungu, lyoli vikufuma
ma nsi munuumu. 17 Insi peeka ni nsungakho
zyakwe imbiibhi, vikushila. Ileelo umuntu we
akubhomba zye zikumukhondezya uMulungu,
akubha nu wuumi wiila na wiila.

Kubha amiiso na bhalugu bha Kilisiti

18 Bhaana bhaani, insiku izya kumpeleela
zifishile! Mwimvwizye kuti umulugu wa Kilisiti†
akwinza, niishi abhalugu abhinji abha Kilisiti
bhinzile. Shiniisho she tukumanya kuti tuli mu

† 2:18 2:18 Umulugu wa Kilisiti kwe kuti we akudindanjila
imbombo ya Kilisiti.

nsiku izya kumpeleela. ¹⁹ Abhantu bhanaabho bhafumile kukwitu, ileelo bhatamile nu wapeeka uwa nalyoli nitwe. Kwe kuti inga bhabhanje nu wapeeka uwa nalyoli nitwe, nhani bhasyalile kukwitu. Ileelo bhakhasogola, inga yilolesye apazelu kuti bhatamile nu wapeeka nitwe.

²⁰ Ileelo imwe uMlungu abhapiye uMupepu uMufinjile,‡ ishi mweni muwumanyile uwanalyoli. ²¹ Inkubhasimbila ikalaata ili, te kunongwa ye mutawumanyile uwanalyoli, lyoli kunongwa ye muwumanyile. Khabhili mumanyile kuti ilenga lyolyonti litakufuma mu wanalyoli. ²² Umuntu uwi lenga wu naanu? Umuntu uwi lenga wu wula we akukhaana kuti uYeesu wu Kilisiti.§ Umuntu anza wunuyo, we mungu wa Kilisiti, akumukhaana uTaata uMlungu nu Mwana. ²³ Wowonti we akumukhaana uMwana, akumukhaana nu Taata uMlungu. Ileelo, wowonti we akumwitikha uMwana, we ali nu wapeeka nu Taata uMlungu.

²⁴ Ishi, amazwi gaala ge mwimvwizye kufuma kwandilo, mujendeelele kugalema mu mooyo giinyu. Inga mukujendeelele kugalema amazwi ganaago mu mooyo giinyu, pe niimwe

‡ **2:20** 2:20 uMlungu abhapiye uMupepu uMufinjile Mu ndongo iya Shiyunaani yikuti apashiilwe amafuta. ABhaisilaeli we bhakumubhiikha umuntu pa mbombo iya shipuutili ni ya wumwene, bhakhamupakhaga amafuta pi twe kulolesya kuti aposheleeye uMupepu uMufinjile. Bhaazya 1 Samweli 16:13; Yeesaya 61:1. § **2:22** 2:22 UKilisiti kwe kuti ula we asebhilwe nu Mlungu kubhapokha abhantu na kubhatabhaala mu wumwene waakwe. Bhaazya uKilisiti mu Wilulanyo uwa mazwi amajeni.

mütijendeelele kubha nu wupeeka nu Mwana, nu Taata uMlungu. ²⁵ Lye átulajile uMwana lye li liili, kubha nu wuumi uwa wiila na wiila.

²⁶ Inkubhasimbila ziniizi, ku zya bhantu bhaala bhe bhakwanza kubhatezya. ²⁷ ileelo imwe, uMlungu abhapiiye uMupepu uMufinjile, we akwikhala mukaasi yiinyu. Wunuyo we akubhamanyizya zyonti, imanyizyo zyakwe zya nalyoli, te zya malenga. Pe shiniisho, yitakwanziwa kuti umuntu abhamanyizye.* Anza she uMupepu abhamanyiziizye, ishi mujendeelele kubha nu wupeeka nu Kilisiti.

Kwikhala anza bhaana bha Mlungu

²⁸ Ishi bhaana bhaani, mujendeelele kubha nu wupeeka nu Kilisiti, inga mu khabhalilo khe akhayigalukha winza, takhabhe nu wudandamazu, tutakhubhe ku nsoni pi siku ilya kwiza kwakwe.

²⁹ Inga mumanyile kuti uKilisiti mugolosu, mumanye kuti wowonti we akubhomba izya wugolosu, we apapiilwe nu Mlungu.

3

¹ Yeenyi she uTaata uMlungu atuganile nhaani, poope bhakutabhilishila kuti twe bhaana bhaakwe! Nalyoli she tali. Abhantu bhe bhatakumutinikha uMlungu bhatatumanyile, kunongwa ye bhatamumanyile uweene. ² Bhaganwa bhaani, ishi itwe twe bhaana bha Mlungu, ileelo yitamanyishile apazelu

* **2:27** 2:27 Bhaazya Yookhani 14:26.

she tukhayibha. Lyoli tumanyile kuti ma khabhalilo khe uKilisiti akhayigalukha winza, tukhayikholana nawo, kunongwa ye tukhayimulola she ali. ³ Wowonti we akusubhila shiniisho kuti akhayikholana nu Kilisiti, ayizelufwaje inga abhe mufinjile, anza she uKilisiti wanyo mufinjile.

⁴ Wowonti we akubhomba imbiibhi, akunanganya indajizyo zya Mulungu, kwe kuti kubhomba imbiibhi, kwe kunanganya indajizyo. ⁵ Mumanyile kuti uKilisiti ayinzile kuziyefwa imbiibhi zitya. Khabhili uweene atakubhomba imbiibhi naazimo. ⁶ Ishi wowonti we akujendeelela kubha na wupeeka nu Kilisiti, atakujendeelela kubhomba imbiibhi. Wope we akujendeelela kubhomba imbiibhi, atakuziyaganya kuti uKilisiti wu naanu, khabhili atamumanyile.

⁷ Ishi bhaana bhaani, mutakhiitise kuti umuntu wowonti abhatezye. Umuntu we mugulosu pamiiso ga Mulungu, anza she uKilisiti mugulosu, wanyo we akubhomba izya wugulosu. ⁸ Heelo umuntu we akubhomba imbiibhi, muntu wa Seetani, kunongwa ye uSeetani ajendeleeye kubhomba imbiibhi kufuma kuwandilo. Ye nongwa uMwana wa Mulungu ayinzile ma nsi, kuzinanganya imbombo zya Seetani.

⁹ Wowonti we apapiilwe na Mulungu, atakujendeelela kubhomba imbiibhi, kunongwa ye ali ni zya Mulungu mukaasi yaakwe. Atangajendeelela kubhomba imbiibhi kunongwa ye uweene apapiilwe na Mulungu. ¹⁰ Heelo

umuntu we atakubhomba izya wugolosu, awe we atamuganile uwamwabho, wanuuyo te mwana wa Mulumu. Shiniisho she tukuwumanya uwuleganu uwa bhaana bha Mulumu, na bha Seetani.

Kuganana

¹¹ Intumi ye mwáyimvwizye kufuma kuwandilo ye yi yiini: tukhondeeye kuti tugananaje. ¹² Tutakhabhe anzu muntu ula we bhakhatinji uKaayini, we áamile wa mubhomba mbiibhi uSeetani, akhamugoga umunsi waakwe.* Khooni khe ámugojile? Amugojile kunongwa ye imbombo zya Kaayini zyámile mbiibhi, izya munsi waakwe zyámile ngolosu.

¹³ Ishi, bhanholo bhaani mu lwitikho, mutaswigaje inga abhantu bhe bhatakumutinikha uMulumu bhakubhaviitilwa. ¹⁴ Itwe tumanyile kuti twepile mu makha ga wufwe, na kwinjila mu wuumi uwa wiila, kunongwa ye tukubhagana abhanholo bhitu mu lwitikho. Umuntu we atali nu lugano asyalile mu wufwe.†

¹⁵ Wowonti we akumuviitilwa uwamwabho, mugoji. Mumanyile kuti ataliipo umugoji we ali nu wuumi uwa wiila mukaasi yaakwe.

¹⁶ Itwe tulumanyile ulugano, kunongwa ye uKilisiti afumwizye uwuumi waakwe kukwitu. Nitwe shiniisho, tukhondeeye kuti tufumwaje uwuumi witu ku bhanholo bhitu mu lwitikho.

¹⁷ Umuntu wowonti we mugoma wa vintu

* **3:12** 3:12 Bhaazy Wandilo 4:1-8. † **3:14** 3:14 Bhaazy Yookhani 5:24.

akumulola uwamwabho abhuliliilwe, ileelo atakubha nu mwoyo uwa shisa, angalonga bhuliibhuli kuti ali nu lagano lwa Mulungu?

¹⁸ Bhaana bhaani, tutalongaje lyi lomu lyene kuti tubhaganile abhamwitu, lyoli tubhaganaje nalyoli kwi dala ilya kubhabhombela inyinza.

¹⁹ Kubhagana abhamwitu shiniisho, tungabha nu lusimishizyo kuti tukulandata uwanalyoli, khabhili amooyo giitu gakutengaana pamiiso ga Mulungu.

²⁰ She poope tukulongwa mu mooyo giitu tuli nu wutenganu, tumanyile kuti uMulungu we mupiti kushila amooyo giitu, khabhili uweene azimanyile zyonti.

²¹ Bhaganwa bhaani, inga tutakulongwa mu mooyo giitu, pe tungabha nu wudandamazu uwa kusejeelela pamiiso ga Mulungu.

²² Khabhili tukuposheela kufuma kukwakwe lyolyonti lye tukumulaabha, kunongwa ye tukuzitinikha indajizyo zyakwe na kubhomba zye zikumukhondezya.

²³ Indajizyo yaakwe ye yi yiini, kuti tulyitikhaje itaawa lya Mwana waakwe uYeesu Kilisiti, na kuganana, anza she atulajiziizye.

²⁴ Umuntu we akuzitinikha indajizyo zya Mulungu, akwikhala mu wupeeka nawo, wope uMulungu akwikhala mu wupeeka nawo. Tukumanya kuti uMulungu akwikhala mu wupeeka niitwe kwi dala ilya Mupepu uMufinjile we atupiye.

4

Idala ilya kumanya imanyizyo izyi lenga ni zya nalyoli

1 Bhaganwa bhaani, kunongwa ye abhakuwi abhinji abhi lenga bhafumiiye mu nsi, mutabhitikhaje abhantu bhonti bhe bhakuti bhali nu Mupepu wa Mlungu. Lyoli musimishizyaje akhinza kuti umuntu akulongolwa nu Mupepu wa Mlungu awe khaala. 2 Idala ilya kumanya kuti umuntu akulongolwa nu Mupepu wa Mlungu lye li liili: wowonti we akwitikha na kulonga kuti uYeesu Kilisiti, ayinzile akhabha nu mubhili anzu muntu, wanyoye we akulongolwa nu Mupepu wa Mlungu. 3 Ileelo umuntu wowonti we atakumwitikha uYeesu shiniisho, atakulongolwa nu Mupepu wa Mlungu. Umuntu wanyoye akulongolwa nu mupepu wa mlungu wa Kilisiti. Niimwe, mwimvwizye kuti umupepu wanyoye akwinza, ishi ayinzile mu nsi.

4 Ileelo bhaana bhaani, imwe mwe bhantu bha Mlungu, mubhatolile abhantu bhanaabho abhi lenga, kunongwa ye uMupepu waakwe we ali mukaasi yiinyu. Uweene ali na makha kushila umupepu we akubhalongola abhantu bhe bhatakumwitikha uMlungu. 5 Abhakuwi bhanaabho abhi lenga, bha mu nsi, bhakulonga izya mu nsi, bhoope abhantu abha mu nsi bhatakumutinikha uMlungu, bhakubhatejeelezya. 6 Ileelo itwe twe bhantu bha Mlungu. Umuntu we amumanyile uMlungu, akututejeelezya, ileelo umuntu we te wa Mlungu, atakututejeelezya.

Shiniisho she tukumanya uwuleganu wa bhantu bhe bhakulongolwa nu Mupepu uwa

wanalyoli, nu wa bhe bhakulongolwa nu mupepu uwi lenga.

Ulugano lwa Mulumu

⁷ Bhaganwa bhaani, tugananaje, kunongwa ye ulugano lukufuma kwa Mulumu. Umuntu wowonti we akubhagana abhamwabho, apapiilwe nu Mulumu, khabhili we amumanyile uMulumu. ⁸ Heelo umuntu we atakubhagana abhamwabho, atamumanyile uMulumu, kunongwa ye uMulumu wa lugano.

⁹ UMulumu wuuyo atulanjile ulugano lwakwe kwi dala ilya kumusonteelezya uMwana waakwe weeka mwene mu nsi umu, inga tuwaaje uwuumi kushilila kukwakwe. ¹⁰ Ulu lwe lugano, kuti te twetwe twamuganile uMulumu khaala! Lyoli uweene we atuganile itwe, akhumusonteelezya uMwana waakwe, abhe mpumba iya kubhoolwa inga ayeefwe imbi-ibhi zyitu na kutakhomaanya nu Mulumu. ¹¹ Bhaganwa bhaani, inga uMulumu atuganile itwe anza shiniishi, yikwanziwa kuti nitwe tugananaje. ¹² Ataliipo umuntu nuumo we amulolile uMulumu naalumo. Heelo inga tukuganana, uMulumu akwikhala mu wupeeka nitwe, nu lugano lwakwe lukukwila kukwitu.

¹³ Tumanyile kuti tukwikhala mu wupeeka nu Mulumu, wope uMulumu akwikhala mu wupeeka nitwe. Tumanyile shiniisho kunongwa ye atupiiye uMupepu waakwe. ¹⁴ Itwe tulolile, khabhili tukubhasimishizya abhanji kuti uTaata uMulumu amusonteleziizye uMwana waakwe mu nsi, kuti abhe Muposhi wa bhantu.

¹⁵ Umuntu wowonti we akwitikha kuti uYeesu Mwana wa Mulungu, uMulungu akwikhala mu wupeeka nawo, wope akwikhala mu wupeeka nu Mulungu. ¹⁶ Ishi, itwe tumanyile na kwitikha kuti uMulungu atuganile.

U Mulungu wa lugano. Wowonti we akwikhala mu lugano, we akwikhala mu wupeeka nu Mulungu, uMulungu wope akwikhala mu wupeeka nawo. ¹⁷ Kwi dala liniilyo, uMulungu akukwilizya ulugano lwakwe mukaasi yiitu, inga tabhe nu wudandamazu pi siku ilya kulongwa. Kunongwa ye uwiikhalo wiitu mu nsi umu, wukukholana na she uYeesu akhikhhalaga. ¹⁸ Pe pali nu lugano patali ni lyoga, lyoli ulugano ulwa nalyoli lukwefwa ilyoga lyonti, kunongwa ye kulongwa kwe kukubhabhiikha abhantu kuti bhogopaje. Umuntu wowonti we ali ni lyoga, ulugano lwa Mulungu lutakwiliye mukaasi yaakwe.

¹⁹ Itwe tukugana kunongwa ye uMulungu we atalile kutugana. ²⁰ Inga umuntu akulonga kuti amuganile uMulungu kumo akumuviitilwa uwamwabho, akwanda malenga. Kunongwa ye umuntu we atamuganile uwamwabho we akumulola na miiso, atangakhola kumugana uMulungu we atakumulola. ²¹ U Mulungu atupiiye indajizyo kuti wowonti we amuganile uMulungu, akhondeeye kuti amuganaje nu wamwabho.*

5

* **4:21** 4:21 Bhaazya Bhalaawi 19:18; Maalika 12:30-31.

Kuzitola imbiibhi izya mu nsi

¹ Umuntu wowonti we akwitikha kuti uYeesu wu Kilisiti, wunwuyoye we apapiilwe nu Mulumu. Umuntu wowonti we akumugana umupaafi, akumugana nu mwana wa mupaafi wunwuyoye. ² Ishi she tukumanya kuti tubhaganile abhaana bha Mulumu: kwi dala ilya kumugana uMulumu, na kuzitinikha indajizyo zyakwe. ³ Kumugana uMulumu kwe kuti, tuzitinikhaje indajizyo zyakwe. Khabhili indajizyo zyakwe te mwamu. ⁴ Kunongwa ye wowonti we apapiilwe nu Mulumu, akuzitola izya mu nsi. Shiniishi she tukuzitola izya mu nsi: ku lwitikho lwitu. ⁵ Bhuli! Wu naanu we angakhola kuzitola izya mu nsi? Wu wuula we akwitikha kuti uYeesu Mwana wa Mulumu.

Ulusimishizyo ku zya Yeesu Kilisiti

⁶ UYeesu Kilisiti we ayinzile ku minzi,* na kwi bhanda ilya kufwa kwakwe. Atinzile ku minzi meene khaala, lyoli ku minzi na kwi bhanda. Wooke uMupepu uMufinjile akusimishizya kuti ganaago ga nalyoli, kunongwa ye uMupepu uMufinjile we wanalyoli. ⁷ Kuli gatatu ge gakusimishizya izya Yeesu: ⁸ uMupepu, am-inzi, ni bhanda ilya kufwa kwakwe, ganaago gatatu gali nu lusimishizyo lwe lukwitinhana. ⁹ Inga tukulwitikha ulusimishizyo lwa bhantu, ulusimishizyo lwa Mulumu lwe lupiti nhaani. Kunongwa ye lunwulwo lwe lusimishizyo lwe uMulumu afumwizye ku zya Mwana waakwe.

* **5:6** 5:6 Ku minzi Pamu yikutekha aminzi aga lwozyo lwa Yeesu awe aminzi aga kupaapwa kwakwe.

10 Umuntu we akumwitikha uMwana wa Mlungu, ayitishile kuti ulusimishizyo lunuwu lwa nalyoli. Ieelo we atakumwitikha uMlungu, akumabhiikha uMlungu kuti wi lenga, kunongwa ye atalwitishile ulusimishizyo lwe uMlungu afumwizye ku zya Mwana waakwe. 11 Ulusimishizyo lunuwu lwe lu luulu: uMlungu atupiiye uwuumi uwa wiila, uwuumi wanuwu tukawaaga kwa Mwana waakwe. 12 Umuntu we ali nu wapeeka nu Mwana wa Mlungu, ali nu wuumi wanuwu. Ieelo we atali nu wapeeka nu Mwana wa Mlungu, atali nu wuumi wanuwu.

Amazwi aga kumalilizya

13 Inkubhasimbila amazwi ganaago, imwe mwe mukumwitikha uMwana wa Mlungu, inga manye kuti mali nu wuumi uwa wiila. 14 Ulusimishizyo lwa wudandamazu wiitu pamiiso ga Mlungu lwe lu luulu: tumanyile kuti akutwimvwa inga tukumulaabha lyolyonti nu shigane shaakwe. 15 Kunongwa ye tumanyile kuti akutwimvwa we tukumulaabha lyolyonti, tumanyile kuti akuutupa zye tukumulaabha.

16 Kuli ni mbiibhi zye zitakumabhiikha umuntu ukutali nu Mlungu wiila na wiila. Inga umuntu akumalola unholo waakwe nu lwitikho akubhomba imbiibhi anza ziniizyo, amupuutile kwa Mlungu, wope uMlungu atiimupe uwuumi. Yikubha shiniisho ku bhaala bhe bhakubhomba imbiibhi ziniizyo. Ieelo kuli ni mbiibhi zye zikumabhiikha umuntu ukutali nu Mlungu wiila na wiila. Ine intakuti amupuutile kwa Mlungu ku mbiibhi ziniizyo. 17 Kubhomba

lyolyonti lye litakhondeeye pamiiso ga Mũlungu, kwe kubhomba imbiibhi. fleelo peeka na ziniizyo, ziliipo imbiibhi zye zitakumabhiikha umuntu ukutali nu Mũlungu wiila na wiila.

¹⁸ Tumanyile kuti umuntu wowonti we apapiilwe nu Mũlungu, atakujendeelela kubhomba imbiibhi, kunongwa ye uMwana wa Mũlungu akumulindiilila, umubhomba mbiibhi uSeetani atangamubhomba naalimo. ¹⁹ Tumanyile kuti itwe twe bhaana bha Mũlungu, na kuti abhantu abhanji bhonti bhakutabhaalwa nu mubhomba mbiibhi uSeetani. ²⁰ Khabhili tumanyile kuti uMwana wa Mũlungu ayinzile, atupiiye uwumanyi, inga tumumanye uMũlungu uwa nalyoli. Tuli nu wapeeka nu Mũlungu uwa nalyoli, kwi dala ilya kubha nu wapeeka nu Mwana waakwe uYeesu Kilisiti. Unu we nu Mũlungu uwa nalyoli, khabhili we wuumi uwa wiila.

²¹ Bhaana bhaani, mubhanje amiiso, mutakha-puute ivifwani ivwa bhamũlungu.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3aa8e7a3-f258-5182-ab3f-fbc6f725bb06